



KOMUNIKADO PA PRENSA

Fecha
22 di mart 2016

Kolaboradó di Maneho
Corinne Leysner

Email
corinne.leysner@gobiernu.cw

MINISTER CAMELIA-RÖMER TA INSTITUÍ KOMISHON 'WATER MANAGEMENT' RIBA DIA INTERNASHONAL DI AWA

Willemstad – Pa medio di un dekreto di su mes ministerio i di esun di e ministerio di Salubridat, Medio Ambiente i Naturalesa, Minister Suzy Camelia-Römer a instalá e Komishon 'Water Management' ku tin ku kana e trayekto pa yega na un maneho integral di awa pa Kòrsou. A skohe e dia di awe, 22 di mart, ku for di aña 1992 internashonalmente ta proklamá komo dia pa para ketu na e importansha di awa. Meta di e komishon ta pa yega na un proposishon pa un maneho di awa dentro di seis luna.

E komishon 'Water Management' ta konsistí di representantenan di Gobièrnu, Aqualectra, NGO i di sosiedat sivil. E representantenan gubernamental ta ekspertonan di e ministerionan di VVRP, GMN i Finansa, pero Minister Camelia-Römer a splika ku e personanan tambe ta skohí pa motibu ku kada un di nan tin un interes hopi profundu den e tópiko.

E komishon ta bai traha ku supkomishonnan pa yega na kontenido pa e maneho. Ora papia di maneho integral di awa, ta referí na fangumentu, almasenamentu i distribushon di awaseru, prosesamentu responsabel di awa di kloaka, produkshon di awa, kalidat di awa, protekshon di awa di laman i tambe di generá aktividatnan sosial, ekonómiko i edukativo ku un bon maneho di awa ta trese kuné.

Banda di maneho, tin aspektonan urgente di nos infrastruktura aktual ku mester atendé kune, pa asina evitá e kantidat grandi di awa di awaseru ku ta bai laman. Mester buska manera pa resiklá mas tantu awa pa finnan di agrikultura i konservá nos bida bou di laman. E impakto riba konservashon di nos medio ambiente por ta grandi i un bon maneho di awa ta influenshá nos vegetashon i ta duna hopi benefisio riba tèrmino largu.

Ya kaba e diferente organisashonnan ku ta traha riba infrastruktura ta usa métodonan ku ta tene kuenta na un manera duradero ku nos medio ambiente. Un maneho integral di awa, karga dor di diferente ministerio, lo duna mas kontenido na e vishon di traha riba un tremendo Kòrsou pa biba aden i un tremendo Kòrsou pa bishitá.



KOMUNIKADO PA PRENSA

Fecha

22 di mart 2016

Kolaboradó di Maneho

Corinne Leysner

Email

corinne.leysner@gobiernu.cw

Miembronan di e komishon ta Vanessa Tore, Gerald Rosina i Albert Martis (VVRP), Jeanine Constansia-Kook i Ciaretta Profas (GMN), Daniel Corsen (Finansa) i Fundashon TAS.